

EAE-KO AURREKONTUAK. Gaur da egitekoa osoko zuzenketen gaineko bozketa

Auzitegiek bozketa sistema zigortuko dutela dio Mayor Orejak

Aurrekontuek eta Ibarretxeren planak kanpoko inbertsioak uxatu dituztela esan du

Agentziak | **GASTEIZ**


Jaime Mayor Oreja Eusko Legebiltzarreko PPko presidentek dioenez, «Justiziak, lehenago edo geroago», EAEko aurrekontuak onartzeko sistemaren aurka egingo du. Iaz hainbeste ika-mika sortu zituen prozedura erabiltzea erabaki du aurten ere Juan Maria Atutxa Eusko Legebiltzarreko presidentek, hau da, osoko zuzenketak banaka bozkatzea. Eta, iaz bezalaxe, oposizioko alderdiak ez daude konforme.

Atutxaren erabakia «oso larria» dela eta «erakundeetara eskandalua ekartzea» dela uste du Mayor Orejak. Salatu zenez, «irteerarik gabeko bidera garamatza berriro». Horregatik, EAJri, Atutxari eta Juan Jose

Ibarretxe EAEko lehendakariari eskatu zien «okerra berandu baino lehen zuzentzeko». Lehenago ere iragarri zuen osterantzean auzitara joko dutela.

Haren arabera, 2002ko aurrekontuak onartzeko moduak «juridikoki segurtasunik eza» ekarri zuen, eta hori da «atzerriko inbertsioak desagertzeko» arrazoia; hori eta Ibarretxeren proposamena. «Partida batzuk denbora gutxi barru inkonstituzional edo legez kanpoko izendatuko dituzten ez jakiteak segurtasun eza dakar».

Espainiako Ekonomia Ministerioaren datuetan oinarrituta, Mayor Orejak esan zuen EAEn %90 jaitsi direla atzerriko diru sarrerak, «lehen seihilekoan». Jaurlaritzak sortutako «etengabeko zalantzen eta nora ezaren



DAVID AGUILAR / EFE

Jaime Mayor Oreja PPko ordezkaria, atzo, Eusko Legebiltzarrean.

ondoriotzat» jo zuen hori; «Ibarretxeren proposamenaren ondorio kaltegarria», azken finean. «EAJren kultura politikoa beti nahi duena egitea da».

Gaur da egitekoa osoko zu-

zenketak eztabaidatzeko plenoa. Iaz, zenbait pleno eragotzi zituzten oposizioko alderdiek, protesta gisa. Azkenean, Batasunak ahalbidetu zuen aurrekontuen onarpena.

MANIFESTAZIOA

UGTk bat egingo du Ibarretxek ETArekin kontradeitutako ekitaldiarekin

Erredakzioa | **DONOSTIA**

EAEko UGTko zuzendaritza batzordeak abenduaren 22an Bilbon egingo den manifestazioan parte hartzea erabaki du. Juan Jose Ibarretxe Eusko Jaurlaritzako lehendakariak deitu zuen *ETA kanpora* lelopeko manifestaziora.

«Bera eta bere egitasmo subiranista babesteko ekintza ezkutua ez izatea espero dugu», dio sindikatu horrek atzo kaleratu prentsa-oharrean. «Demokratak ETArekin kontrabiltzea garrantzitsua» dela uste du, eta halako ekintzak sarriago egin behar direla. Langile guztiei manifestazioan parte hartzeko deia egin zuen EAEko UGTk.

Jaurlaritzako hirukoaz gain, PSE-EEk ere hartuko du parte manifestazioan. Aski Da elkarteak «profil propioarekin» joateko asmoa erakutsi zuen, eta Arabako ahalbide nagusi Ramon Rabanera ere (PP) joatekoa da.

BISITA. Ipar Irlandarako ministro britainiar ohiak hitzaldia eman zuen



DAVID AGUILAR / EFE

Mo Mowlam ministro ohiarekin bildu da Ibarretxe

Mo Mowlam Ipar Irlandarako britainiar ministro ohiak Juan Jose Ibarretxe EAEko lehendakariarekin bildu zen atzo goizean, Gasteizen. *Deia* egunkariak gonbidatu zuen, 25. urteurrena dela eta. «Bi bake prozesu ezin dira inoiz berdinak izan», Mowlamek atzo esan zuenez. Euskal Herriaren ikuspe-

giaren berri izan, «informazioa eta ideiak jaso», eta, gero, urte hasieran, «beste ikuspegi bat duten Espainiako pertsonen azaltzeko» asmoa du ministro ohiak. Atzo arratsaldean, hitzaldia eman zuen Mo Mowlamek, Bilbon. Ipar Irlandako bake prozesua izan zuen hizpide.

EUSKAL PRESOK. Gaur amaituko dute lehen baraualdia



LUIS JAUREGIALTZO / ARGAZKI PRESS

Baraurik, presoek eskubideen alde

Euskal presoek eskubideen alde eta ideien kriminalizazioaren aurka Deustuko San Pedro elizan bost eguneko baraualdiari ekin dioten LABeko eta Sozialista Abertzaleak taldeko ordezkariak hilean zehar Bilbon egingo duten ekimenen berri eman zuten atzo. Besteak beste, Bilboko Udaleko hurrengo osoko bilkuran aurkeztuko duten mozio baten berri eman zuten. Proposamena Etxerat-ek sustatu du eta presoek sakabanaketa salatu, Bilboko presoak hurbiltzea eskatu eta hiru laurdenak beteak dituztenak askatzea galdatzen du.